

冇反應冇呼吸

場景：家

偉俊：嫲嫲，我返嚟喇！

（冇人應聲）

偉俊：（四處張望）唔應我嘅？唔通出咗去？嫲嫲！

（發現嫲嫲倒卧喺地上，面色蒼白，冇呼吸，胸口冇起伏）

偉俊：（衝埋去）嫲嫲！嫲嫲！（搖佢膊頭）你聽唔聽到我講嘢呀？

（鄰居姨姨經過門口，聽到叫聲）

姨姨：（拍門）偉俊，發生咩事呀？

偉俊：（大叫）嫲嫲暈咗喺地下，面色蒼白，冇呼吸，叫佢冇反應呀！

姨姨：唔好緊張，我有學過急救，你開門俾我入嚟幫嫲嫲啦。

（開門）

（姨姨用十秒時間檢查頸動脈脈搏，同時觀察胸口起伏以檢查呼吸）

姨姨：偉俊，立即打999叫救護車。同埋打去管理處叫佢哋擺部自動體外心臟去顫器上嚟。

（姨姨打開嫲嫲件衫做心外壓）

（救護員到場接手繼續進行心外壓）

救護員：婆婆係你哋邊個呀？

姨姨：我係鄰居，呢個係佢個孫。

救護員：有冇婆婆身份證喺度呀？同佢登記返資料。

偉俊：（遞上身份證）有呀。

救護員：幾時發現佢失去意識㗎？最後見到佢冇事係幾時呀？

偉俊：頭先四點半鐘放學返嚟就見到佢暈咗喺地下，冇呼吸，冇反應。今朝出門口返學之前佢話心口有啲唔舒服。

救護員：佢有冇咩長期疾病，例如高血壓、糖尿病、心臟病，或者曾經中過風？

偉俊：佢有高血壓。

救護員：可唔可以俾我睇下佢平時食開嘅藥呀？

偉俊：（遞藥）呢度。

（救護員將嫲嫲送往醫院）

偉俊：當發現有人倒卧地上，叫佢冇反應，並且冇呼吸嘅時候，應該立即搵人幫手，打999叫救護車，同埋盡快進行心外壓，救護員到場後同佢哋交待事發經過。

00027:《冇反應冇呼吸》FIRST AID-Unresponsive No Breathing

The CC BY 4.0 license REQUIRES that any reused or repurposed content must have the correct ATTRIBUTION. Please use the text below in your citations, printouts and copyright pages.

Attribution Text

“FIRST AID- Unresponsive No Breathing” (Cantonese), written by Cheung Tak Ying and T. T. CHEUNG, illustrated by Szeto Wing Yan, published by HamBaangLaang (© HamBaangLaang, 2021) under a [CC BY 4.0](#) license on hambaanglaang.hk

[Find out more here: [HamBaangLaang Attribution terms and CC 4.0](#)]
